



Kalaallit Nunaata Kitaani raajat pillugit aqutsinissamut pilersaarummik nutarterinissaq pillugu tusarniaanermi allakkat

01-07-2025

Suliap normua: 2024 - 23617

All. nr. 25419389

Postboks 269

3900 Nuuk

Oqarasuaat (+299) 34 50 00

Fax (+299) 34 63 55

E-mail: apn@nanoq.gl

www.naalakkersuisut.gl

Kalaallit Nunaata Kitaani raajat pillugit aqutsinissamut pilersaarutip piffissaq atuuffia ulloq 31. december 2025-mi naassaaq, taamaattumillu taanna nutarterneqarnikuuvoq. Aqutsinissamut pilersaarut Aalisarnermut siunnersuisoqatigiinnit ilaasortaqtumit suleqatigiissitamit suliarineqarnikuuvoq, matumunnga ilaapput, Sulisitsisut, KNAPK, QAK, NUSUKA, Sustainable Fisheries Greenland, Royal Greenland A/S, Polar Seafood Greenland A/S, Oceans North Kalaallit Nunaat, Aningaasaqarnermut Akileraartarnermullu Naalakkersuisoqarfik, Pinngortitarnut Avatangisinnullu Naalakkersuisoqarfik, KANUAPNA aamma Pinngortitaleriffik. Aalisarnermut, Piniarnermut, Nunalerinermut Imminullu Pilersornermut Naalakkersuisoqarfik ataqtigiissaarisuunikuuvoq.

Aqutsinissamut pilersaarummik suliaqarneq 2025-mi januarimi aallartinneqarpoq, 2025-milu junimi naammassineqarluni. Tassunga atatillugu Kalaallit Nunaata Kitaani 2021-2024-mi raajarnarluni aalisarnermut nassuiaat aamma suliarineqarpoq, aqutsinermut pilersaarummik nutarterinermut tunngavigineqarsimasoq. Nassuiaat nassaarineqarsinnaavoq uani Naalakkersuisut.gl.

Aqutsinissamut pilersaarut Naalakkersuisut akuersissutigissappassuk, taanna ulloq 1. januar 2026-mi atuutilissaaq.

Kalaallit Nunaata Kitaani raajarnarluni (*Pandalus borealis*) aalisarnerup uumasooqassutsikkut inuiaqatigiinnilu aningaasarsiornikkut qularnaatsumik ingerlanissaa aqutsinissamut pilersaarutip siunertaraa. 2010-miilli Kalaallit Nunaata Kitaani raajarnarluni aalisarneq aqutsinissamut pilersaarummik peqarnikuuvoq. Aqutsinissamut pilersaarut atuuttoq atuarneqarsinnaavoq uani Naalakkersuisut.gl. Kalaallit Nunaata Kitaani raajarnarluni aalisarneq piujuartitsisuusutut uppersaasigaavoq, Marine Stewardship Council-imit (MSC).

Matumani aqutsinissamut pilersaarummi allannguutit pingaarnerit nassuiarneri ilanngullugit.

- Piffissaq atuuffiusoq allanngortinneqarnikuuvoq, taamaalilluni aqutsinissamut pilersaarut 2026-miit 2030 tikillugu atuuttussaalluni. Ukiunut tallimanut piffissap atuuttarnera nalinginnaasuvoq.
- Inatsimmut atuuttumut nutaanerpaamut inatsit nutartigaavoq. Tamanna ilaatigut isumaqarpoq, sinerissap qanittuani avataanilu aalisariutit akornanni pisassanik agguassinermut agguassinermi periutsumik peqartoqarunnaartoq, sumiiffinni killilersuineq pillugu aalajangersakkat nutarterneqarnikuusut aamma qarasaasiatigoortumik nalunaarsuiffeqarnissaq (logbog) pillugu immikkoortoq

ilanngunneqarnikuusoq aamma pineqaatissiisernerit nalunaarutiginnittarnerillu pillugit immikkoortumik peqartoqalersoq. Inatsimmik nutaamik ilaqartillugu ilanngussaq 1 nutarterneqarnikuuvoq.

- APNIPN-p aamma KANUAPNA-p taaguutaat nutarterneqarnikuupput.
- Immikkoortoq 2-mi misiligutissanik tiguisarneq pillugu immikkoortoq ilanngunneqarnikuuvoq. Raajarniarluni aalisarnermi peqataasut tamarmik misiliutissanik tiguisarnissaat pillugu 2025 aallarnerfigalugu piumasaqaataalerpoq. Tamanna 2025 sioqqullugu taamaallaat avataasiorluni aalisarnermi peqataasunut piumasaqaataanikuuvoq.
- Pinngortitaleriffimmit siunnersuinerup aamma taassuma atuisunit atoruminarnerulernissaa pillugu suleqatigiissitap kissaateqarnerata kingorna ilisimatuussutsikkut siunnersuisarneq pillugu immikkoortoq 3.1-mi allaaserisaq allanngortinneqarnikuuvoq. Innersuussissut B_{peqqutaasartog} aqutsinissamut pilersaarummi siornatigut nassuiarneqarsimanngikkaluarpoq. Taamatuttaaq ilisimatuussutsikkut siunnersuisarneq pillugu immikkoortoq 1.1-mi oqaasertaliussat nutarterneqarnikuupput.
- Pisassiissutit tamarmiusut pillugit aalajangersagaq pillugu immikkoortoq 3.2.1, pisut immikkuullarissut pillugit nassuiaataasoq, qanoq paasineqassanersoq pillugu nalornisoqarnissaa pinngitsoorniarlugu allanngortillugu allaaserineqarnikuuvoq. Pisut immikkuullarissut nassuiaapput, pisassiissutitnik tamarmiusunik aalajangersaanermut aqutsissutitut maleruagassami piffissap qanoq ilinerani saneqqutsisoqarsinnaanersoq. Pisuni taakkunani Aalisarnermut Siunnersuisoqatigiit aggersarneqartassapput. Suleqatigiissitami isumaqatigiissutigineqartoq tassaavoq, pisut immikkuullarissut ukiumi pineqartumi ilisimatuussutsikkut siunnersuinermit ukiullu siuliani pisassiissutinit tamarmiusunit aalajangersarneqarsimasunit allaanerusut aallaavigalugit suussusersineqartassasut. Tamatuma saniatigut immikkoortoq 3 ilanngunneqarnikuuvoq, tassani aalisagaqatigiit innersuussissutit B_{trigger-peqqutaasartup} ataaniikkaangata pissutsinut nassuiaat. Immikkoortoq taanna, maannakkut aqutsinissamut pilersaarutit atornerani misilittakkat peqqutigalugit nutarterneqarnikuuvoq.
- Pisassiissutit tamarmiusut aalajangersarneqartarnerat pillugu immikkoortoq 3.2.1 ilanngunneqarnikuuvoq, tassani aalisagaqatigiit aalajangersimasumik amerlassuseqarnertik ataakkaangassuk Canada-mik isumasioqateqartarnissaa nassuiarneqarpoq. Immikkoortoq taanna aalisarnerup pijuartitsinissamik uppersaasarnissaa (MSC) qulakkeerniarlugu suliarineqarnikuuvoq, tassa piffissami matumani aalisagaqatigiit pillugit Canada-p Kalaallit Nunaatalu akornanni pisortatigoortumik isumaqatigiisummik peqartoqanngimmat. Oqaasertaliussaq Canada-p aqutsinissamut pilersaarutaani oqaasertaliunneqartumut naapertuuppoq.
- Pisassiissutit tamarmiusut agguataarneqartarnerat pillugu immikkoortoq 3.2.2-mi, Canada-mut agguataarineq nassuiarneqarpoq. Taanna suleqatigiissitap ataatsimiinnerani oqallisissiatut saqqummiunneqarnikuuvoq. Agguataarinnermut allannguutissat pillugit kissaatinik saqqummiussisoqarnikuunngilaq. Agguataarineq tullissaanik aqutsinissamut pilersaarut nutarterneqaaqqilerpat nalilersorneqassaaq.
- Aqutsinissami suliniutissat allat pillugit immikkoortoq 3.3.3 ilanngunneqarpoq. Tassani inuussutissarsiortunit suliniutissat pineqarput, taakku aalisarnermi raajanik mikisunik pisaqartarnerup annikillissarnissaa pillugu suleqatigiinnissaa kissaatigaat.

Sulinermut pitsaasumut angusaqarfiulluartumullu suleqatigiissitaq
Naalakkersuisoqarfimmit qutsavigineqassaaq.